


September 1937.

No. 36.

Taen ka 4.



SAM KAUW GWAT PO

Orgaan dari Batavia Buddhist Association, Sam Kauw Hwe Batavia, Menado dan Telokbetong.

ARTIKEL SPECIAAL DALEMINI NUMMER:

Sam Kauw dengen Peperangan.
Mentjari Katentreman Hidoep (XIV)
oleh Kwee Tek Hoaij.

Buddha poenja Ampat Kabeneran
Moella, oleh Kwee Tek Hoaij.

Pelajaran Khong Tjoe fatsal „GIE“
oleh toean Tjia Djoe Tjiat Menado.

BAROE SELESE DITJITAK

Tooneelstuk

Mihabhiniskramana

(The Great Renunciation)

Penolakan besar pada kasenangan doenia Satoe
lelakon penting dalem penghidoepan Buddha.

Dalem Ampat Bagian. Oleh K. T. H.

Dalem ini lelakon orang nanti dapat liat lebih djelas lagi Buddha poenja sifat dan tabeat jang lemah-lemboet, moerah dan berkasian, dan segala sebab-sebab kenapa ia tinggalken astana dan anak istrinjya.

Disini ada diloekeksen sifatnya Prins Siddhartha sebagai manoesia, sabagi soeami, ajah, sobat dan madjikan jang dermawan dan sanget menjinta pada sasoeatoe machloek jang hidoep. Dan orang nanti liat lebih djelas Poetri Yashodhara poenja tabeat sawadjarnja sabagi satoe prampoean jang lemah-lemboet dan menjinta keras pada soeaminja.

Ini tooneelstuk dari bermoelah sampe pengabisan ada ditoelis dengen pake styl tinggi, penoeh dengen oedjar dan oeljap-oetjapan agoeng, berisi nasehat dan peladjaran jang memaksa aken orang batja beroelang-oelang, dan siapa satoe kalih soedah ketarik, tiada gampang aken loepa kombali.

Dengan membatja ini tooneelstuk, orang poenja pengartian tentang azas-azas dari Buddhisme nanti bertambah loeas; zonder memikir keras dan poeter otak, dan traoesah ilangin banjak tempo, orang nanti lantes mengenal dengen lebih djelas toedjoeannja Buddha poenja peladjaran.

Pembeli jang sasoedahnja membatja, merasa isinja tida memoasken, boleh kasih kombali, dan dapat poelang oewangnya atawa toeker sama laen boekoe.

Harga per djilid f 0,75, franco di post Aangeteekend tambah f 0,20.

Abonne ini maandblad boleh traoesah kirim oewang dimoeka, nanti ditagih bersama oewang abonnement.

BOEKHANDEL „MOESTIKA“

Tjitjoeroeg (Preanger).

Naga sabagi Symbool.

Di sabelah ini ada dimoeat gambar dari piiar-pilar-nja Klienteng Kambing Item di Szechuan jang ada mempoenjai perhoeboengan dengen riwajat dari peng-hidoepannja Lao Tze, jang disangka soedah perna berdiam dalem itoe krenteng. Itoe pilar-pilar ada pake gambar Naga jang melilit dan teroekir aloes, seperti jang banjak digoenaaken dalem krenteng atawa tempel-tempel Tionghoa jang teritoeng besar, dan begitoe poen dalem roemah-roemah tempat memoe-dja aboe leloehoer, astana-astana dan gedong-gedong officieel jang penting, kerna gambar Naga ada djadi satoe matjeun bagian jang sanget penting dalem kunst Tionghoa.

Ini kapentingan boekan boeat kabagoesan sadja, hanja lantaran dari djeman koeno sekalih itoe Naga oleh orang Tionghoa dipandang sabagi symbool dari Kasoetjian, Kapandean, Kabesaran dan Kakoeasa'an. Ini binatang soetji ada djadi djoega pertanda'an dari Keizer-keizer di Tiongkok jang dipandang sebagai Poetra Langit (Tjin Beng Thian Tjoe) kerna ia ada djadi kepala-agama paling tinggi dan manoe-sia satoe-satoenja jang mempoenjai hak aken lakoe-ken sembahjangan menjoegeoh pada Thian sabagi wakil dari sekalian rahajat. Dalem ini hal anggepan Tionghoa tentang sifatnya Naga ada mirip seperti ~~ka-~~ pertjaja'an Hindoe, jang pandang Naga sabagi symbool dari Goeroe-goeroe Soetji tingkatan tinggi. Tjoemah di negri Barat oeler Naga dipandang sebagai binatang djahat, lantaran orang salah mengarti itoe dongengan oeler dengen Eva di dalem Bybel.

Keterangan djelas tentang artiannja symbool Naga orang bisa dapet taoe dalem boekoe „Arti dan Resia-nja Symbool-symbool“ jang bakal lekas ditjitak dan diterbitken oleh Boekhandel Moestika, Tjitoeroek.



Pilar-pilar jang pake oekiran Naga dari Kgenteng Kambing Item di Chengtu, Szechuan, dan riwajatnja soedah ditoetoerken dalamini maandblec No 31 dan 32.

Sam Kauw Gwat Po.

三教月報

*ORGaan DARI BATAVIA BUDDHIST ASSOCIATION,
SAM KAUW-HWE BATAVIA, MENADO
DAN TELOKBETONG.*

ISINJA INTI MAANDBLAAD ADA DIOEROES DAN DITANG-
GOENG OLEH REDACTIE „MOESTIKA DHARMA.”

*Harga abonnement per kwartaal f 0,75. Pembajaran dimoeka.
Kaloë berlangganan dirangkep sama Moestika Dharma atau,
Moestika Romans boeat ini maandblad tjemah tambah per
kwartaal f 0,50. Harga advertentie boleh berdami.*

Kantoor Redactie Administratie: Tjitjoeroeg, Preanger.

Sam Kauw dengen Peperangan.

Berhoeboeng dengen itoe kagemperan jang terbit lantaran pertempoeran antara Tiongkok dan Japan, maka pastilah antara orang-orang jang perhatiken Sam Kauw — jaitoe peladjaran dari Khong Tjoe, Buddha dan Loo Tjoe — djikaloe tida menjataken dengen berterang, sedikitnya di dalem hati ada menanja : apakah saorang jang mendjalanken peladjaran batin jang toedjoeannja mentjari katentreman dan perdamian, boleh djoega toeroet merasa goesar kapan tanah aer-nya diserang ? Apakah wadib ia toeroet ambil ba-
giyan dalem permoesoehan dan peperangan ?

Djawaban dari ini pertanyaan bisa didapet dengen djalan pereksa bagimana pikirannya itoe tiga Goeroe, Doenia terhadep peperangan.

Maski samoea peladjaran soetji ada menentangin pemboenoehan dan perampasan, boeat mana pepe-
rangan ada termasoek, dan tentang mana itoe tiga Sengdjin poen tida terkatjoeali, tetapi marika poen sampe insjaf bahoea manoesia di doenia tida bisa

terlolos dari kamoestian aken bergoelet dengan se-gala matjem sifat-sifat djahat, hingga satoe pertem-poeran — dengan sifat rendah dari dalem dirinja sendiri, atawa poen dengan moesoeh dari loear — boekam sadja tida bisa ditjegah, hanja terkadang ada djadi satoe kawadjiban jang tida haroes dipoengkir.

Khong Tjoe, jang salaennja mendjadi Goeroe Doe-nia djoega ada satoe staatsman (pengoeroes negri) dan penjinta manoesia, maski selaloe berdaja aken tjiptaken perdamian — sebab tjoemah dalem perdamian baroe rahajat bisa beroentoeng — tida perna sangsi aken tjaboet sendjata terhadep perboeatan djahat, kedjem dan sawenang-wenang, jang menjangsaraken pada manoesia. Maka dalem oesia tinggi, koe-tika mengaso di negri Louw pada sasoedahnja balik dari pengoembara'an tigablas taon lamanja, Khong Tjoe boeat pengabisan kalih telah koendjoengi pada Radja Louw dengan pake tanda-tanda kabesaran — boeat oendjoek jang itoe koendjoengan bersifat officieel — aken madjoeken permoehoenan soepaja Radja Louw bersariket dengan laen-laen negri tetangga aken maloemken perang pada negri Tjee, sebab radja dari Tjee soedah naek di atas tachita dengan djalan merampas dan memboenoeh pada Radja jang sah, satoe kadjahatan jang tida haroes diantepin oleh sa-soeatoe orang jang menjinta ka'adilan.

Begitoelah Khong Tjoe poenja pakerdja'an officieel jang pengabisan sabagi Djoeroe-nasehat dari Radja Louw dan Goeroe dari Rahajat, adalah boeat minta dimaloemken perang boeat melawan satoe perboeatan djahat.

Bagimana dengan Buddha?

Di bawah ini kita koetip oetjapanija Buddha pada Generaal Simha jang ada dimoeat dalem Hikajat *Buddha Gautama* djilid VI fatsal LXIV pagina 61-62:

„Tathagata mengadjar bahoea samoëa bekalahian

SAM KAUW DENGEN PEPERANGAN.

dalem mana manoesia moesti saling boenoeh pada soedara-soedaranja ada satoe perboeanan jang menjedihken, tapi ia tida mengadjar aken anggep salah pada orang jang tjaboet sendjata aken berperang boeat membela fihak jang bener, sasoedahnja segala daja aken pegang tegoeh perdamian mendjadi sia-sia. Jang moesti tanggoeng itoe kasalahan jalih orang jang djadi lantaran hingga petjah itoe peperangan.“

Kita rasa ini oetjapan dari Buddha soedah sampe terang, dan mengoendjoek satoe katjotjokan penoech dengen sikep dari Khong Tjoe.

Loo Tjoe poenja pikiran tentang peperangan aken membela diri atawa mendjalanken ka'adilan, ada bersifat samar, sebab iapoenja peladjaran ada ditoedjoeken pada poko perkara, pada akar atawa svember dari kakaloetan doenia, boekan pada tjabang-tjabangnya jang soedah mendjadi serba roewet dan soesah dioeroes. Ia boekan soeroe orang berperang aken melawan kajahatan atawa kakedjeman, hanja mendjaga soepaja *tida ada perang atawa tida perloe orang moesti berperang*. Di bawah ini kita koetip beberapa oedjar dari *Tao Teh King* jang berhoeboeng dengen peperangan :

„Sifat jang lemah-lemboet selamanja dapet kamennangan kaloe menjerang, dan tinggal selamet kaloe membela diri.“ (Fatsal LXVII : 14)

„Panglima jang gagah tida bersikep galak.

Toekang bekalahi jang pande tida brangasan.

Toekang menaloekin jang paling pinter tida perna memaloemken perang.“ (LXVIII : 1-4).

Oetjapan Loo Tjoe jang paling djelas tentang peperangan ada terdapat dalem fatsal LXIX dari *Tao Tek King*, jang sa'anteronja membitjaraken oeroesan perang, seperti di bawah ini :

1 : Satoe Panglima Perang jang termashoer perna bilang : „Akoe tida maoe djadi toeang roemah (tjoe-

lang), akoe lebih soeka djadi tetamoe; akoe tida berani madjoe satoe duim, akoe lebih soeka moendoer satoe kaki.“

2. Inilah jang dinamaken koempoel berbaris zonder itoe barisan madjoe ka moeka; tjaboet sendjata zonder dipake aken bekalahi; pegang kepala pedang zonder ditjaboet dari saroengnya; menghampiri moesoeh zonder lakoeken pertempoeran.

3. Tida ada satoe perboeatan jang begitoe tjlaka seperti memaloemken perang dengen hati enteng. Sebab dengen berboeat begitoe kita terantjem aken kailangan apa jang paling berharga.

4. Kapan doeа tentara bekalahi dalem satoe peperangan, fihak jang merasa menjesel lantaran soedah terpaksa moesti menoempahkan darah, ialah pasti aken dapat kamenangan.“

Seperti kabanjakan oedjar-oedjar dari Loo Tjoe, boeninja fatsal di atas poen sabagian besar ada samar, hingga perloe diterangkan lagi maksoednya jang lebih loeas.

Dalem ajat 1, itoe peroepama'an „Toean roemah“ dan „Tetamoe“ ada didasarkен atas adat kabiasaan Tionghoa, jang kapan kadatengan tetamoe, si toeан roemah haroes madjoe dan bertindak lebih doeloe, sedeng si tetamoe tjoemah mengikoeti sadja. Ini ada berarti, itoe Panglima jang termashoer tida perna djadi penjerang atawa memaloemken perang lebih doeloe, hanja lebih soeka membela diri dari serangan moesoeh. Ini sikep boekan sadja ada lebih selamet, tapi djoega tjoetjok sama watek dari Tao, jang kakoeasa'an dan kabesarannya ada terdapat dalem sifat lemah-lemboet.

Bahoea membela diri ada lebih oetama dari menjerang, itoe poen ada dioendjoek dengen djelas dalem ajat 2, dimana hal bikin persedia'an perang zonder menggoenaken itoe tentara dan sendjata boeat

SAM KAUW DENGEN PEPERANGAN.

bertempoer, hanja oentoek pegang tegoeħ perdamian, ada dianggep sabagi daja jang paling baek dan heroes dioetamaken oleh marika jang berlakoe menoe-roet Tao.

Dalem ajat 3 Loo Tjoe oendjoek dengen djelas, bagimana tida baeknya itoe kasoeka'an boeat mendjagooin atawa memaloemken peperangan dengen hati enteng, sebab kapan satoe bangsa soedah pandang ringan pada pemboenoehan dan penoempahan darah aken merampas dan menaloekin, maski bisa dapet kamenangan ia poen aken kailangan miliknja jang „paling berharga“, jaitoe welas-asih, lemah-lembenet, mendjoengdjoeng pri kamanoesia'an, penoeh kasian, dan laen-laen sifat baek jang beräda dalem dirinja, dan laloë terganti oleh kaboeasan, kakedjeman, ka-goesaran, ingin membales dan mendendem sakit hati atawa gemes pada moesoeħ, dengen ditambah lagi oleh kaserakahān jang beräoes darah. Loo Tjoe pandang ada sanget tjilaka dan meroegiken kapan boeat bisa bangga soedah menang perang, merampas daerah loeas, taloekin banjak bangsa laen, benderanja berkiber-kiber di banjak negri, satoe bangsa moesti kailangan marika poenja pri kamanoesia'a, kerna itoe segala kaoentoengan lahir sifatnja tida kekel dan saliwanan, sedeng apa jang marika kailangan ada barang jang paling berharga dalem kahidoepan.

Maka itoe dalem fatsal 4 Loo Tjoe beri kapastian, kapan doeä lawanan moesti bertempoer di medan perang, fihak jang lakoeken itoe pertempoeran dengen perasa'an menjesel — saking terpaksa aken membela diri, boekan sengadja hendak toempahken darah — marikalaloh jang aken dapet kamenangan. Boleh djadi djalannja peperangan ada laen; boekan djarang kadjadian, fihak penjerang jang serakah dan kedjem, tetapi tentaranja lebih tegoeħ, bisa kalahken pada itoe lawanan jang terpaksa tjaboet sendjata aken

membela diri. Tetapi kamenangan jang betoel selaloe beräda pada siapa jang berdiri di fihak ka'adilan, sebab maski di lahir kalah, di batin ia tetep menang, dan inilah ada kamenangan jang kekel.

Dari pada sarinja oedjar-oedjar di atas orang bisa meliat, maski Loo Tjoe tida bilang dengen djelas, toedjoean dari pengadjarannja ada tjotjok dengen anggepan dari Buddha dan Khong Tjoe, bahoea madjoe bertempoer di medan perang boekan satoe kadosa'an kapan toedjoeannja tjoemah boeat membela diri, laitoe orang tjaboet sendjata dengen menjesel hati saking terpaksa, dan boekan boeat poeasken hati serakah aken kedjer kaoentoengan, kapoedjian, kamas-hoeran dan laen-laen lagi. Djadinja maski Loo Tjoe dengen djelas tentangin pada peperangan dan oendjoek segala kadjahatannja, tapi itoe Goeroe Doenia tida larang aken orang bekalahi boeat membela diri, malah pastiken, bahoea fihak jang berperang dengen hati menjesel dan soedah menoempahkan darah manoesia boekan dengen sengadja, ialah jang moesti dapet kamenangan.

Djoestroe dalem pertempoeran Tiongkok-Japan, bangsa Tionghoa ada pada fihak jang membela diri, lawan penjerangan moesoeh saking terpaksa, sasoe-dahnja begitoe banjak taon Pamerentah dan rahajat Tiongkok oendjoek kasabaran loear biasa boeat sing-kirken peperangan dan tjari perdamian. Djikaloë sa'ande Loo Tjoe, Buddha dan Khong Tjoe masih hidoepl di doenia sekarang ini, pastilah itoe Tiga Sengdjin nanti benerken djikaloë bangsa Tionghoa, lantaran soedah poetoes akal aken pegang perdamian dengen Japan, terpaksa melawan sama sendjata maskipoen bilang millioen manoesia aken binasa, kerna seperti Buddha bilang pada Generaal Simha : — „Jang moesti tanggoeng itoe kasalahan jalah orang jang dijadi lantaran hingga petjah itoe peperangan.”

Mentjari Katentreman Hidoep.

(Serie XIV).

OLEH KWEE TEK HOAIJ.

(*Lezing dari Batavia Buddhist Association dalem Klenteng Kwan Im Tong pada tanggal 3 Juni 1937*).

Soedara-soedara,

Dalem lezing dari doe minggoe jang laloe saja soedah bitjaraken terganggoenja manoesia poenja katentreman lantaran memake tabeat lemah, lembèk dan gampang menoeroet atas desekan dan pengaroeh dari loear. Sekarang saja maoe bitjaraken poelah saroepa tjetjat laen, jang banjak orang kliroe pandang

Dengan adanya ini beberapa pengendjoekan dari pikiran dan pengadjarannja itoe tiga Goeroe Doenia, kaoem Sam Kauw poen boleh traoesah bersangi lagi aken tetepken sikepnja dalem pertempoeran Tiongkok-Japan jang sekarang ini. Dan salaennja dari itoe, djangan diloepta djoega, sasoeatoe bangsa ada poenja karma sendiri. Marika jang soedah terlahir dalem satoe bangsa, ada poenja kawadjiban atawa dharma terhadep itoe bangsa dimana ia ada terhitoeng. Siapa terlahir di antara bangsa Tionghoa, ia ada poenja tanggoengan atawa kawadjiban pada ini bangsa, sebab djikaloe tida ada apa-apa jang mengiket atawa mendjadi tanggoengannja, ia poen bisa terlahir di antara sakean banjak bangsa laen. Maka ada dengan sapantesnya djikaloe sabagi orang Tionghoa ia merasa goesar atawa tida setoedjoe pada perboeatannja Japan di Tiongkok, tetapi itoe kagoesaran boekan moesti didasarkeni atas kabentjian, hanja goena membela pada ka'adilan, jaitoe jang tjara Inggris dinamaken *Rightious Indignation*, atawa Kagoesaran satjara Benner, jang berbangkit lantaran menjinta pada kabeneran, hingga terbebas dari pengaroehnya hawa nafsoe atawa angkara moerka.

Sabagi tabeat atawa sikep baek dan berharga, jaitoe terlaloe maoe rapih, bérès dan bener, dan tida bisa liat tjatjat atawa kasalahan laen orang.

Menoeroet Buddha poenja pengadjaran, segala apa jang terlaloe ka pinggir atawa miring ka satoe fihak selamanja tida baek, kerna djalanjan jang bener biasa beräda di tengah. Begitoe poen orang jang terlaloe maoe rapih, beres, bener, seperti djoega jang terlaloe pegang atoeran, terlaloe oetamaken *Lee*, terlaloe soedjoet agama, terlaloe resik dan terlaloe beritoengan dalem segala oeroesan, achirnja bisa menjasar ka djoeroesan mentjong, tjoepet dan fanatiek.

Sikep begini masih tida apa-apa, tida sabérapa djadi rintangan atawa menjoesahin, kapan orang goenaken tjoemah boeat dirinja sendiri sadja. Tetapi saorang jang terkenal „resik“ — apalagi jang „terlaloe resik“ — biasanja sanget bentji dan tida senang kapan meliat laen orang berlakoe mesoem atawa djorok. Orang jang sanget soedjoet agama, biasanja merasa koerang tjetjok pada siapa jang tida perhatiken kabatinan sama sekalih, apalagi pada kaoem jang menentangin atawa pandang rendah pada iapoenna agama. Begitoe poen saorang jang pegang keras pada adat-istiadat sopan-santoen atawa *Lee*, seringkalih merasa mendongkol dan ketjiwa kapan berhadepan pada orang-orang jang berlakoe sembarang dalem pergaoelan, tiada mengenal atawa tiada maoe perhatiken adat-istiadat jang sopan dan aloes. Kadjengkelanja lantes naek sampe di poentjak djikaloe jang berboeat begitoe ada iapoenna anak-anak dan laen-laen familie lebih moeda jang ada dalem kakoeasa'annja boeat pimpin dan adjar. Dan dalem pertjoba'annja boeat bikin laen-laen orang jang beräda dalem kakoeasa'annja atawa berdekatan padanja nanti berlakoe menoeroet tjara jang ia ingin, biasanja ia sering kena terbentrok jang membikin ia djadi sengit, oetjapken

LEZING-LEZING DI KWAN IM TONG.

perkata'an keras, banjak menjomel dan membentak, atawa selaloe tekoek moeka asem, hingga kasoe-dahannja oleh familie, pegawe atawa sobat-sobat-nja, ia terkenal sabagi saorang TJEREWET atawa BERADAT KERAS, pada siapa orang tida boleh sembarang atawa gegabah boeat beroeroesan. Tabeat begini matjem ada terdapat banjak sekalih antara orang-orang toea, apalagi djikaloe ia ada saorang hartawan dan berpengaroeh. Dan sedeng itoe kakerasan dan katjewetan belon pasti memberi hatsil seperti jang di-inginken, ganggoean pada dirinja sendiri bisa lantes kaliatan, jaitoe dengen linjapnja iapoena ja poena katentreman dan renggangnya perhoeboengan pada banjak orang jang tida bisa berlakoe menoeroet iapoena maoe. Boekti jang paling njata dari terganggoenja iapoena kasenangan bisa diliat dari si tjerewet poena moeka jang ketjoet, soeara jang kakoe atawa tabeat jang tida sabaran.

Aken tetapi apa jang dinamaken „keras“, „bengis“ atawa „tjerewet“ tida samoeanja djelek, malah banjak djoega jang perloe dan berfaedah, maka sabelonnja dilandjoetken ini pembitjara'an lebih djaoe ada perloe diterangin mana jang baek dan tida baek.

Kakerasan atawa katjewetan jang bersifat *baek* jaitoelah jang boekan moentjoel dari itoe orang poena tabeat, hanja ia kasih oendjoek keras dan tjerewetnja lantaran hendak penoehken kawadjiban jang aken tida bisa berdjalan beres kapan ia berlakoe lembek atawa tjintjay. Satoe opas pendjaga straat boekannja „keras“ dan „tjerewet“ djikaloe ia menegor atawa menangkep kandaran jang mengambil djalan boekan di sabelah kiri, hanja di kanan. Ini ada perloe boeat mendjaga kasantosa'an oemoem. Djoega boekannja „keras“ dan „tjerewet“ djikaloe satoe conducteur menegor pada orang jang berloedah sembarang di dalem trein, sebab itoe perboeatan membikin *tida*

enaknja laen penoempang jang kasenangannja haroes diperlindoengin. Ada banjak pamoeka-pamoeka peroesaha'an atawa perdagangan jang adaken atoeran keras terhadep pegawe-pega wenja maski tabeatenja ada terkenal sabar dan lemah-lemboet, hatinja moerah dan bisa kasian orang, tetapi ia terpaksa adaken itoe atoeran goena kaberesannja peroesaha'an. Oepamanja, banjak fabriek jang pake koeli harian atawa minggoean, soedah lantes potong gadji pegawenja jang dateng telaat maski tjoemah satoe djam, zonder preksa atawa tanja lagi kenapa atawa apa sebabnya. Kapan boeat mendjalanken atoeran dari kaberesan dan kasantosa'an orang tida bisa berlakoe keras dan tjerewet, oepama tinggal diam kapan meliat orang bikin pelanggaran, apalagi dengen sengadja, lantes ini doenia tentoe mendjadi kaloet, hingga mendatengken boeah jang lebih tida enak, lebih pait dan getir, dari pada kaloe dipegang keras dan ditjerewetin dari bermoe-lah. Banjak soeal salah mengarti, perfektjokan dan permoesoehan, bisa ditjegah atawa disingkirken dji-kaloe kiranya orang tadinja tida berlakoe terlaloe ètjoh atawa tjin-tjay, hanja ditjerèwètin dan dipaitin lebih doeloe dari waktoe baroe moelai. Maka „tjerèwèt” samatjem itoe, jang maksoednya boeat menjegah kakliroean atawa salah mengarti, atawa boeat pegang discipline dan melakoeken kawadjiban, sasoenggoeh-nja ada *perloe*.

Sabaliknja sikep keras dan tjerewet jang tida baek adalah kapan moentjoel dari itoe orang poenja tabeat, hingga boekan sadja dalem soeal-soeal penting dan berfaedah jang menjangkoet pada kawadjiban, hanja segala oeroesan tèktèk-bengèk poen maoe dikerasin dan ditjerèwètin. Oepamanja, ada banjak orang toea jang saban-saban mlarang sambil menjomel kapan meliat anak-anaknja jang masih ketjil berlari-larian. „Ai, ini anak, boekannja djalan biar betoel!” ia menegor

sambil mata melotot. „Djangan lari, nanti loe djatoh!“ Komoedian ia bitjara pada kawan-kawannja: „Goewa mantak djengkèl hadepin ini anak, engga maoe diam, tingkanja seperti tjatjing kena aboe!“ dan laen-laen tjomelan lagi.

Ini katjerèwètan ada bersifat tjoepet dan bodo, lantaran si iboe atawa ajah tida mengenal sifat dari natuur jang mengandjoerin pada anak-anak boeat berlakoe actief dan bergenbirah, radjin bergerak dan berlari, soepaja badannja jang lagi membesarin djadi soeboer dan lekas melar. Kasoeka'an berlompat dan berlari-lari ada tertampak djoega pada sadjoemblah anak-anak dari binatang. Dan sekarang si orang toea maoe larang itoe anak-anak boeat berlakoe menoeroet natuur. Marika maoe disoeroe berdjalan, bergerak dan bergaoelau satjara orang-orang toea jang berkalakoean aloes dan sopan, *gentleman* atawa *koen-tjoe*, biar poen oesianja baroe lima taon! Dari sebab itoe anak soedah tentoe tida bisa berlakoe seperti empe-empe atawa oewa-oewa, maka kasoedahannja timboel pergoelestan jang melinjapken katentreman dari kadoea fihak — si anak dan si orang toea. Kapan si anak, dari berani dan keras hatinja, mendapat kamenangan dan boleh toeroet maoenja sendiri, fihak orang toea poenja pikiran djadi kesel dan mendongkol jang bikin linjap katentremanja. Kapan fihak iboe-bapa daat pet kamenangan, itoe anak poenja kasehatan dan tabeat aken mendjadi roesak lantaran terpaksa ioen-toet kahidoepan jang tida normaal. Saking takoet pada tjomelan atawa labrakan, ia bisa berlakoe pendiam dan alim di depan mata orang toeanja, tapi lantes oendjoek binal dan nakalnja kapan marika beräda di laen tempat. Dengan begitoe itoe anak sama djoega didesek atawa dipaksa aken beladjar *berlakoe palsoe* dan *poera-poera* boeat kelaboein laen orang, sama-tjem tabeat jang di komoedian hari nanti meroegiken

sangget pada dirinja sendiri dan pada orang banjak.

Terkadang ada djoega anak-anak jang memang betoel tida soeka berlarian, tida nakal, tida maoe maen di loempoer, tida perna bertjanda, tida soeka mengganggoe kawan-kawan atawa bekalahi, pendek-nja : bisa memenoehin angen-angen jang dikandoeng oleh iboe-bapanja. Tetapi anak jang begitoe sering-kalih mengandoeng apa-apa jang *abnormaal* dalem toeboeh atawa batinnja. Anak jang peroetnja pe-noeh tjatjing poen biasanja pendiam dan tida actief, begitoe poen jang berotak lemah, gêndêng, atawa badannja tida sehat; maka sabaliknja dari merasa *pœas* dan *bangga*, boeat itoe kalakoean jang seperti orang toea dari anak-anaknja jang masih ketjil, si iboe-bapa sabenernja haroes *berkoeatir*.

Dalem oeroesan pakerdja'an, memake boedjang atawa jongos, poen ada banjak orang jañg berlakoe keras dan tjerewét tida kapantesan. Ia selaloe mengeloeh dari itoe jongos poenja males atawa bodo, dengen tida pikir, satoe koeli jang dibajar 15 cent sahari atawa boedjang prampean jang digadji f 2,00 saboelan, tida oesah diharep nanti ada poenja kapan-dean dan pengartian seperti nona-nona kaloearan sekola boeat huishouding. Kapan marika ada poenja itoe matjem kamampoean nistjaja tida maoe djadi boedjang dengen gadji begitoe rendah. Maka satoe kepala roemah jang pande tida nanti minta pada boedjang-boedjangnja pakerdja'an jang lebih baek dari apa jang marika sanggoep, dan tida menjesel kapan pegawe jang tenaganja tjoemah 25 katti tida bisa angkat barang jang 100 katti beratnja. Dan kapan ia kapingin dapet orang-orang jang memoeasken, ia haroes bersedia aken membajar gadji jang satimpal, boeat ganti itoe boedjang-boedjang jang males dan bodo. Tapi banjak toean roemah jang tida bisa atawa tida soeka ambil ini tindakan, hanja pake teroes

itoe orang-orang bodo jang bergadji moerah, tetapi saban hari menjomel dan memaki-maki atas iaorang poenja kabodoan, hingga membikin poesing kepala pada segala orang jang berdeketan padanja, dan boedjang-boedjangnya poen tida bisa awet, sabentar-bentar diganti baroe, hingga kasoedahannja iapoенja kacentremann sendiri selaloe terganggoe tida brentinja. Ini poen teritoeng katjerewètan jang tjoepet, kerna tida bisa menaoein dan koerang loeas pertimbangan.

Dalem pergerakan kong-ek poen ada banjak sekalih orang-orang jang terkenal „djiatsiem“ dan „giat“ soedah menjomel pändjang-pendek atas kawan-kawan sakerdjanja poenja alpa, males, „dingin“ tida maoe djalanken kawadjibannja. Terkadang kadjengkelannja ditoedjoeken pada publiek jang koerang menjinta pada sasama bangsa, tida bisa hargin gerakan baek, tida bernafsoe aken mentjari kamadjoean, „terlaloe keno,” atawa tida bisa toeroet aliran djeman, dan sabaginja lagi. Ini matjem sikep seringkali mendjadi sebab dari timboelnja pertjektjokan dan kabentjian, kerna itoe orang-orang jang alpa dan males kabanjakan tida maoe lantes terima disalahin dan ditjomelin, hingga achirnya si djiatsiem tadi merasa kapok atawa tobat aken tjampoer kong-ek lagi, laloe oendoerin diri sambil mengamboel dan tida maoe taoe satoe apa.

Lelakon samatjem ini, jang banjak terjadi di manama, poen pokonja ada dari katjoeptan dan koerang loeas pemandangan. Saorang pande dan berpengalaman tjoekoep dengen lantes bisa liat bagimana kwaliteitnja itoe orang-orang dengen siapa ia hendak bekerdja, dan tida lantes taro pengharepan terlaloe besar pada itoe pakoempoelan atawa pada besstuurnja, hanja merasa poeas dengen sedikit hatsil jang bisa didapet. Sedeng ia sendiri bekerdja giat dan radjin, ia tida djadi koerang senang kapan laen,

laen kawan tida membantoe dengen soenggoe hati, kerna dari bermoelah ia soedah tida taro banjak harapan pada marika poenja bantoean. Kasoedahan njia ia boekan sadja tida djengkel dan menjomel, hanja malah bisa tinggal tersenjoem kapan meliat itoe gerakan tida madjoe, empas-empis atawa ampir „goeloeng tiker,” sebab ini samoea soedah ada dalem iapoena rekenan.

Sabagi djoega itoe orang-orang tani jang tida nanti harep hatsil besar dari tanah kering dan koeroes, begitoe poen itoe orang-orang jang mengarti, kapan tjampoer satoe pakoempoelan, tida nanti paksa diri aken bikin gerakan besar dalem kalangan jang pengartian dan tenaganja masih serba ketjil. Sabaliknja, saorang jang masih bodo dan tjoepet, selaloe kan-doeng impi-impian moeloek atas pergerakan jang ia tjampoer dengen mengandel sama pepatah „It Ho Ban Soe Seng,” jaitoe „Kapan bisa rempoek biar sapoeloe riboe matjem pakerdja'an bisa didjadiken.” Ini memang betoel. Satoe ka-tjoa besar bisa digotong oleh ratoesan semoet jang rempoek mengaloear-ken tenaga. Tetapi itoe tenaga *ada watesnja*. Kaloe itoe ratoesan atawa riboean semoet disoeroe gotong bangkenja tikoes — biar poen tjoemah tikoes njing-njing jang ketjil — marika tentoe *tida sanggoep!*

Djaminja dalem segala hal moesti ada watesnja dan orang tida boleh mengharep lebih dari itoe wates, jang beroepa kamampoean dari sasoeatoe golongan jang diminta bantoeannja. Kaloe soedah kataoean itoe golongan ada terdiri dari orang-orang jang males, pas-sief dan kouwkati, tida perloe si pemimpin kong-ek tadi moesti menjomel dan menggeroetoe, kerna itoe tjomelan tida bisa bikin jang males djadi radjin dan jang kouwkati djadi lojar menderma, hanja malah berbalik ia tida disoeka, dimoesoehin dan difitenah, hingga kasoedahan njia timboel kabentjian dan saling panas-pa-

nasan jang melinjapken iapoenja katentreman.

Dalem oeroesan kabatinan poen begitoe djoega. Banjak pemimpin jang waktoe bikin lezing atawa omong sama kawan-kawan biasa mengeloeah dan berdoeka lantaran gerakannja tida dapet tjoekoep bantoean atawa perhatian, hingga tida bisa djadi besar dan madjoe. Banjak jang merasa ketjiwa kapan membikin lezing tjoemah sedikit sadja jang dateng mendengerin. Memang betoel ada lebih baek kaloe lezing-lezing atawa pertemoean saban-saban bisa di koendjoengin oleh ratoesan atawa riboean orang. Kaoem Theosoof memang haroes bergirang kaloe bisa bikin pendoedoek di satoe kota seanteronja djadi Theosoof. Tetapi sedeng maksoed jang dikandoeng ada besar dan loeas, haroeslah orang djangan boetaken mata pada itoe boekti-boekti, bahoea soedah oemoemna aken manoesia tida gampang ketarik pada peladjaran, philosophie atawa kabatinan jang tinggi, dan di mana mana memang tjoemah sedikit sekalih orang jang soeka taro perhatian pada pengataoean batin, katjoeali djikaloe ia ada poenja kapentingan boeat tarik kaoentoengan, oepama ingin disemboehin dari penjakin, dan laen-laen berkah jang didjandijken. Maka satoe gerakan jang tjoemah menjiarken peladjaran moraal dan philosophie, soedah pasti tida bisa populair antara rombongan orang banjak, hingga tida haroes si pemimpin taro pengharepan terlaloe besar, hanja boleh merasa poeas aken bekerdja sadja dalem kallangan ketjil. Maka ini pengartian, dan dikandoengnya pengharepan saderhana, membikin tida bisa timboel kadjengkelan atawa kamnenjeselan, hingga si pemimpin tida perloe oering-oeringan pada publiek jang tida soeka denger peladjaran dan nasehat baek, atawa pada sobat dan familienna jang tida soeka goenaken tempo boeat hadlirin pertemoean-pertemoean. Sabaliknya dari kedoeahoeng dan mendongkol, ia malah bisa

bergirang djikaloe satoe pertemoean jang dikira bakal dateng tida lebih dari sapoeloeh orang, soedah bisa dapet koendjoengan dari beberapa belas atawa doea tiga poeloeh pendenger.

Djadinja sikep saderhana, jang tida taro pengharepan terlaloe besar, terlaloe bagoes, terlaloe banjak dalem segala apa jang kita inginken, itoelah ada obatna boeat singkirin rasa kadoehoeng dan kamenjeselan, jang sabetoelnja memang tida perloe, kerna salaennja mengganggoe katentreman diri sendiri, djoega hatsilnja tjoemah membikin laen-laen orang djadi koerang senang atawa linjap kagoembirahannja.

Dalem penghidoepan roemah tangga antara familie, banjak katentreman telah termoesna lantaran sang soeami merasa gemes jang istrinja poenja tabeat dan perboeatan tida memenoehken pengharepannya, atawa sang istri sakit hati lantaran sang soeami poenja kammpoean dan kalakoean tida memoeasken angengangennja. Banjak iboe-bapa jang kadjengkelan saoemoer hidoepl lantaran anak-anaknja, jang marika ingin biar djadi orang pinter dan terpeladjar, sopan dan oe-hauw, radjin dan gemer, tjari doeit, achirnja ternjata berada djaoe di bawah dari itoe oekoeran jang diharep. Dan sebab dari itoe kamenjeselan tida soesah ditjari. Semingkin satoe ajah kaptinginin anak-anaknja biar oe-hauw atawa berbakti, semingkin ia nanti dapetken apa-apa jang bersifat *poet-hauw*. Semingkin keras orang oetamaken *Lee* atawa adat-istiadat jang sopansantoen, semingkin ia nanti ketemoeken perboeatan jang *Boe-lee* atawa bertentangan dengan kapantesan. Semingkin keras ia infjer matanja pada sifat *djoedjoer*, ia nanti dapet liat banjak sekalih perboeatan *tida djoedjoer*. Semingkin keras orang maoe *basmi* sifat *kouwkati*, ia nanti ketemoeken semingkin banjak perboeatan jang *tjoemah perloein kaoentoengen diri sendiri sadja*.

LEZING-LEZING DI KWAN IM TONG.

Soedara-soedara brangkalih maoe tanja: mengapatah begitoe ?

Sebabnya tida laen, hanja lantaran dalem doenia tjoemah sedikit, amat sedikit orang jang sampoerna betoel, dan ampir pada sasoeatoe orang moesti sadja terdapat tjatjat-tjatjat, tjoemah bedanja ada jang banjak dan ada jang sedikit ; ada jang poenja tjatjat besar dan ada jang tjoemah kasih liat tjatjat ketjil. Sekarang djikaloe kita selaloe toedjoeken perhatian kita, atawa ingin dapetken, apa jang paling bersih dan sampoerna, lantes segala tjatjat jang tadinja tida kaliatan djadi ter-bèbèr dengen njata. Siapa maoe dahar trasi atawa kedjoe dengen lebih doeloe dipreksa sama microscope, ia tentoe dapat liat bilang millioen koetoe-koetoe aloes jang membikin ia tida bisa dahar lagi itoe doe a matjem barang dengen merasa girang dan sedep.

Banjak barang makanan jang kaloe dipreksa bagaimana dibikinnja, orang djadi merasa djidji boeat dahar. Kaloe kita pergi di satoe restaurant Tionghoa, bilang sadja di Pantjoran, dan liat bagimana si koki restaurant bekerdja, liat daging-dagingnya jang dikroebotin laler, kajoe talénannya jang mesoem, iapoenja koeali penggorengan, iapoenja topo jang dipake seka itoe koeali, iapoenja aer jang dipake boeat tjoetji piring dan gelas, dan laen-laen lagi, — kapan ini samoea kita preksa dengen terliti, lantes itoe tjaptjay, ba-mi atawa biefstuk jang berbaoe sedep kita aken merasa djidji boeat dahar. Tjoemah dengen meloepaken pada itoe samoea, dengen pikir sadja kaperloean djedjel peroet, baroelah orang bisa makan dan minoem di itoe restaurant-restaurant dengen enak.

Dalem pergaoelan dan pakerdja'an di ini doenia, dimana satiap hari kita haroes berhadepan atawa berhoeboengan pada manoesia dari berbagi-bagi tingkat-an moraal, tabeat dan kapandean, kita-orang tida

boleh terlaloe tjerewèt aken hatepken kaberesan, k

epantesan dan kabedjikan terlaloe banjak; maka itoe tida perloe aken kita menjomel, merasa goesar dan kesel, terhadep segala apa jang tida memoeaskan. Djikaloe moesti djoega berlakoe keras, tjerewèt dan pegang discipline, orang poen boleh lakoeken itoe dengen sabar dan pikiran tenang, jang biasanja lebih ditakoetin atawa diendahin dari-pada kabiasaan riboet memaki atawa menjomel sabentar-bentar. Orang bisa oendjoek sikep garang dan bengis zonder hañinja panas atawa goesar. Inilah jang dibilang *seperti boenga trate*, jang maski beräda di tengah aer dan loempoer tetapi tida bisa basah atawa kotor. Maka siapa ingin hidoeptentrem, ia moesti tjoba beladjar aken djangan terlaloe tjerewèt pada segala fjalat dan kasalahan laen-laen orang, sama siapa ia tida ada perhoeboengan jang bersifat menanggoeng, dan maskipoen ia sendiri bisa hidoeptersih dan beres, djangan terlaloe ambil poesing pada laen-laen orang jang toentoet penghidoepan njasar dan kaloet, hanja tjoba berlakoe seperti itoe Mi-lek Hoed (Lord Maitreya) jang patoengnja ada di itoe altaar, jang selaloe tersenjoem terhadep manoësia poenja kabodoan dan katjoepetan.

Kapan kita-orang bisa berlakoe begioe, soedara-soedara, kita lantes dapet mengindjek dijanan jang manganter pada katentreman, dan soeal-soeal jang menimboelken kesel dan koeatir nanti mendjadi banjak koerang, maski poen tida bisa lantes linjap sama sekalih.

Selamet malem !

Buddha poenja Ampat Kabeneran Moelia.

II.

OLEH KWEE TEK HOAH.

(Lezing dari Batavia Buddhist Association di Klenteng Kwan Im Tong, pada tanggal 5 Augustus djam 8 sore).

Soedara-soedara,

Dalem lezing jang pertama saja ada bitjaraken Buddha poenja peladjaran tentang Djalanan Tengah dengen ambil artian jang berhoeboeng dengen soeal berlakoe pantes dan kira-kira dalem hal makan, sebab dari pengalaman Buddha telah dapet kanjata'an, dengen menjiksa diri dan berpoeasa teroes-meneroes hingga badannja roesak, orang tida nanti bisa dapet kamadjoean batin, dan tjoemah sasoedahnja melepaskan itoe segala atoeran keras dan pantangan, serta djalanken kombaii atoeran hidoepr dari saorang biasa jang makan dan minoem satjara pantes, baroe-lah Buddha bisa dapetken itoe penerangan jang ditjari.

Aken tetapi toedjoeannja ini peladjaran, seperti soedara-soedara tentoe bisa mengarti sendiri, boekan tjoemah berwates pada soeal dahar makanan. Itoe Djalanan Tengah ada beroena djoega boeat laen-laen soeal jang mengenaken manoesia poenja peng-hidoepon. Oepama dalem hal pakean, ada banjak sekalih orang jang keliroe mengira bahoea kapan bisa berdandan netjis dan perlente, ia djadi pegang tegoeih kasopanan dan kapantesan. Di laen oedjoeng kita dapet liat, bagimana ada banjak orang jang tida merasa maloe atawa likat kapan mengadep di moeka oemoem dengen berpakean mesoem dan berbaoe boesoek, atawa hidoepr serba djorok, badan dan pakaeannja tida perna atawa amat djarang ditjoetji atawa dibersihken, hingga siapa jang liat djadi merasa djidji.

Kabanjakan dari itoe orang-orang jang biasa berpakean mesoem ada golongan pemedatan miskin atawa pengemis, jang disangka soedah terpaksahidoep begitoe matjem lantaran tida poenja oewang boeat beli pakean jang pantes diliat orang. Tetapi ini sangka'an tida selamanja betoel, sebab itoe golongan jang mengakkoe tida poenja oewang boeat berpakean pantes, saban minggoe biasa bakar mendjadi asep sadjoemblah oewang jang bisa dipake boeat beli doeatawa tiga stel pijama baroe. Dan sabaliknya ada banjak orang jang tida poenja pentjarian, jang tereroek oetang dan biasa menjikoet ka kanan kiri, kapan kaloear pintoe selaloe berpakean indah dan rapih !

Dan kabiasaan hidoeplah mesoem boekan tjoemah terdapat pada golongan pengemis dan pemedatan jang miskin. Di Tjitjeroeg ada saorang pribomei, pentjarianja berkoeli, jang hidoeplah begitoe djorok hingga orang belon perna liat ia mandi, dan tjlana dan badjoenja belon perna ditjoetji, kapan soedah antjoer di badan ia baroe lemparken. Dan satoe koetika ada orang merasa kasian meliat pakeannja roebat-rabit dan sahget mesoem, lantes kasih persen satoe badjoe bekas jang masih baek dan bersih. Tapi itoe badjoe boekan dipake, hanja.... didjoeal, maski ia boekan satoe pemedatan dan tida perna kalaparan.

Saorang jang hendak mentjari kasampoerna'an batin tida moesti berpakean terlaloe perlente atawa terlaloe djorok dan mesoem, hanja moesti pilih apa jang pantes. Boeat saorang biasa itoe pemilihan haroes didasarken pada deradjat dan kadoedoekannja, dan pada pakerdja'an atawa kawadjiban jang haroes dilakoeken. Satoe machinist, stoker, monteur, atawa koeli-koeli bengkel besi atawa jang bekerdja di dok kapal, ada pantes sekalih kapan dalem pakerdja'an marika memake kemedja dan tjlana drill biroe toea

LEZING-LEZING DI KWAN IM TONG.

atawa item; saorang tani jang mematjoel di kebon atawa meloekoe di sawah poen tida ketjiwa kapan marika pake tjelana pendek dengen badan dan kaki terlandjang. Tetapi Ceremoniemeester atawa Tjoe-lang dari satoe pesta perdjamoean dimana ada diondang orang-orang jang partes, wadjib dan haroes berdandan rapih aken hormatin dan lajanin itoe tetamoe-tetamoe, dan begitoe poen pegawe dari toko-toko atawa restaurant jang biasa dikoendjoengin oleh orang-orang golongan pantes, ada kamoestianja aken melajanin dengen berpakean jang tjetjok dan satimpal sama kawadjibanja.

Orang jang terlaloe soeka riasin diri dengen pakean indah dan sabaginja, boekan sadja moesti kaloearin banjak oewang, tapi djoega sering alamken poesing dan djengkel kapan satoe wakoe ka'ada'an memaksa aken ia berpakean saderhana. Ada pamoeda jang soeka oering-oeringan dan menjomel kalang-kaboet lantaran binatoe tida bawa iapoenna open-jas jang ia perloe pake boeat menonton bioscoop. Ia boekan tida poenja laen badjoe, tjoemah sadja itoe badjoe jang tersedia tida litjin dan berkilap. Ia tida pikir, boeat kaloeear malem dan doedoek menonton bioscoop jang gelap pêtêng, itoe pakean bersih dan mengkilap tida terlaloe penting, sebab tida nanti ada orang jang begitoe radjin aken awasin iapoenna pakean. Tapi lantaran soedah kabiasaan aken berdandan rapih kapan pergi menonton, ia tida senang kaloe moesti berpakean jang soedah koetjel atawa lajoe, atawa sedikit dekil.

Lebih loetjoe lagi kapan diliat tingkanja kongtjoe-kongtjoe atawa siotjia-siotjia jang hendak kaloeear menonton Pasar Oambir, Pasar Malem atawa Tjap-gome. Ada jang boeat berdandan dan riasin diri sadja moesti mengambil tempo sampe satoe djam atawa lebih. Dari masih siang spatoenna soedah digosok dan

di-smeer sampe mengkilap, ramboetnya di-scheiding litjin, pendeknya segala apa soedah dipilih dengan terliti boeat riasin dirinja. Iaorang tida pikir dalem itoe tempat karamean di waktoe malem dimana ada riboean orang saling berdjoebelan, tida ada jang nanti begitoe iseng dan sempét aken awasin marika poenja spatoe, dasi, ramboet, poepoer dan sabaginja lagi, jang kapan soedah poelang ka roemah lantes basah sama keringet atawa lèpèk tertimpah oedjan, dan itoe spatoe jang dipilih dengan terliti, dan disikat atawa di-smeer sampe berkilap, penoeh sama loempoer atawa deboe !

Dalem doe-a-doea hal, jang terlaloe mesoem atawa djorok, dan jang terlaloe soeka berdandan rapih dan netjis, ada soeker sekalih boeat dapat kamadjoean batin. Jang djorok tandanya tida mengenal perasa'an aloes jang haroes diampoenjai oleh saorang jang ingin oetamaken pribodei dan kabeneran, sedeng jang gemer riasin diri pastilah tida perna pikir soeal-soeal karohanian jang tinggi lantaran ingetin kaperloeannja sang toeboeh dan oeroesan doenia sadja.

Dan boekan tjoemah dalem hal pakean, hanja dalem pergaoelan, pakerdjaaan, pamerentahan negri dan laen-laen lagi, mengambil Djalan Tengah ada jang paling perloe, paling berfaedah dan paling selamet; maka dalem Khong Kauw ada dioetamaken sekalih itoe peladjaran tentang *Tiong Yong*, boeat mengadjar manoesia aken mendjaga djangan sampe ingetannja bergontjang dan terlaloe miring ka satoe fihak.

Dalem lezing „Mentjari Katentreman Hidoep” saja soedah bilang, siapa terlaloe ay-kok, terlaloe maoe bérès, terlaloe maoe membéla sobat atawa familie, terlaloe maoe djaga nama dan kahormatan, achirnja bisa terdjeroemoes ka dalem kapoesingan, kadjengkèlan dan kasedihan tida abisabisnja. Pendeknya apa jang bersifat terlaloe atawa *extreme*, jaitoe tida berimbang atawa berdiri sama rata dan di tengah betoel,

bisa mendatengken bahaja, katoewetan dan kasoesahani.

Dalem soeal kabatinan poen banjak katjilaka'an telah moentjoel, boekan sadja lantaran orang tida maoe ambil perdoeli pada agama atawa peladjaran philosophie jang berharga, tapi djoega saking *terlaloe soedjoet* dan *pertjaja* pada pengadjaran dan katerangan-nja goeroe-goeroe agama atawa laen-laen peladjaran batin. Kaloe dalem soerat-soerat kabar tida berentinya diwartaken kadjadian-kadjadian boesoek dari perboeatannja sadjoemblaah goeroe-goeroe agama atawa ilmoe kabatinan — boeat mana oeroesannja Ki Dalang dan Soetarwan ada mendjadi tjonto jang paling baroe — itoelah pokonja ada dari lantaran banjak moerid-moerid dari itoe goeroe-goeroe ilmoe, atawa jang *pertjaja* pada peladjaran dan kasaktiannja, soedah mengandel *terlaloe keras* dan satjara memboeta, hingga ada orang prampoean jang anggep dirinja „mendjadi soetji“ kapan toeroetin hawa nafsoe binatang dari sang goeroe.

Orang jang selaloe bertjoeriga, jang tida maoe pertjaja dan mengandel satoe apa, memang tida baek, sebab dengen itoe sikep ia djadi terpisah dari djalan-an boeat mengenal kabeneran dan dapet kasoetjian. Tetapi orang jang terlaloe pertjaja pada apa jang goeroe-goeroe agama bilang, dan anggep itoe **samoëa** ada betoel dan tida bisa kliroe lagi, poen achirnja bisa djoega menjasar.

Dengen perkata'an „goeroe-goeroe agama“ saja boekan maksoedken tjoemah goeroe-goeroe samatjem kiajie, santri, soe-hoe, occultist, wonder dokter dan sabaginna lagi, jang kabanjakan bekerdja seperti doe-koen atawa termasoek dalem golongan doe-koen, hanya saja maksoedken djoega pendita-pendita agama seperti padri-padri, bhikkhu, hweshio, saykong, oelama, dan pembantoe-pembantoenja, tida perdoeli dari golongan jang mana, dan teritoeng djoega kita-orang poenja

gerakan sendiri.

Biar poen itoe padri-padri, oelama, bhikkhu — dari kaoem Kristen, Islam, Buddhist, Khong Kauw atawa Too Kauw — dengan sadjoedoernja hati hendak siarken peladjaran dari kabaekan dan kaselametan, tapi terkadang kapan itoe penjiar-penjiar agama poenja pemandangan dan pengartian masih serba tjoepet, marika bisa bikin penganoet-penganoet atawa pendenger-pendengernja jang soedjoet dan pertjaja matimatian tetoeroetan mendjadi njasar.

Inilah bisa diliat bagimana ada banjak orang Tionghoa jang kepintjoek sama laen agama satjara tjoepet soedah lempar dan moesnaken aboe leloehoernja, lantaran pertjaja kapan pasang hio di hadepan hio-louw, dirinja djadi „berdosa“ pada Toehan dan „memoejda pada setan-setan“! Ada beberapa orang jang saking pertjaja dirinja telah kamasoekan „roh soetji,“ achirnya telah berlakoe edan-edanan. Lelakon samatjem Ki Dalang poen sering terjadi dengan padri-padri dari satoe kaoem agama jang banjak dianoet oleh orang Tionghoa. Dan malah ada kaoem-kaoem agama jang tida maoe batja boekoe jang menerangkan kafaedahannja agama laen — maski ia taoe isinja itoe boekoe ada baek dan berfaedah — lantaran ta-koet „berdosa“!

Kapan soedara-soedara soeka ambil tempo aken dengerin atawa tanggap obrolannja pemimpin-pemimpin dari berbagi-bagi agama jang saling bersaingan dan mendesek boeat tarik pendoedoek Tionghoa aken menganoet agamanja masing-masing, nanti bisa lantes kaliatan bagimana tjingli jang marika goenaken ada tjoepet dan bersifat seperti anak-anak. Pikiran jang sehat dan pertimbangan jang djernih dan merdika dengan berdasar atas tjingli, tida perna atawa amat djarang tertampak, kerna jang diandjoerin tergetama soepaja orang taro pertjaja dengan memboe-

ta. Inilah boekan dari sebab itoe agama jang iaorang siarken toedjoeannja tida baek, hanja si penjiar-pe-njiar sendiri poenja pengartian seringkalih tjoepet dan fanatiek, jang marika toelarin pada penganoet-penga-noetnja, terkadang dengen goenaken tipoe daja boeat tjelah dan bikin boesoek agama-agama laen soepaja si pendenger merasa djidji, dan mengira si pendita poenja agama ada jang paling baek dan soetji sendiri.

Pada masa ini boekan sadja di saban kota ada terdapat pamoeka-pamoeka jang giat dan actief aken berlomba dan bersaingan boeat siarken agamanja masing-masing, hanja di sabelahnja itoe ada terdapat poelah di segala ploksok ratoesan goeroe-goeroe ilmoe — kiajie, santri, soe-hoe, occultist, wonder-dokter dan sabaginja — jang mengadjarin ilmoe ini atawa itoe, ilmoe gaib jang moedjidjat boeat bikin si moerid mempoenjai pengaroeh dan kakoeasa'an loear biasa, bisa sampeken segala maksoed dan kaingin-anja dengen gampang dan moerah, dan laen-laen peladjaran jang termasoek daem golongan Zwarte Maggie atawa Ilmoe Iblis. Dan antara itoe goeroe-goeroe ilmoe boekan samoeanja ada penipoe jang tjoemah bisa mengobrol sadja, hanja banjak djoega jang perna boektiken kapandeannja dengen djalan menjemboehin orang sakit satjara aneh, bisa sirep orang sampe poeles, dan laen-laen kapandeannja meng-heranken, jang menarik publiek poenja kapertjaja'an atas kasoetjian dan kasaktiannja. Tetapi barang siapa lantes mengandel dengen memboeta, seringkalih kena ditipoe dan disesatken, sebab orang jang bisa poenja-ken samatjem ilmoe gaib jang berdasar atas kakoeatan magneet atawa poen pake ilmoe sirep, belon tentoe pengartiannja tentang moraal dan boedi ada tjoekoep bersih, hanja kabanjakan jang tabeatnja tiда berbeda djaoe dari orang-orang biasa; kaserakahan, kadeng-kian dan nafsoe cheiwani-nja masih tinggal tetep

ada, sedeng pengartiannja atas apa jang dinamaken kabeneran ada djaoe dari sampoerna dan serba mentjong.

Soedah tentoe bagi saorang biasa ada amat soesah boeat lantes kenalin, jang mana antara itoe goeroe-goeroe ilmoe boleh dipertjaja, dan jang mana berbahaja hingga haroes didjaoehken. Djoega tida gampang aken orang lantes insjaf apa itoe peladjaran atawa agama jang disiarken ada berisi kabeneran atawa penjesatan. Tetapi kapan itoe orang soedah mengarti Buddha poenja Djalanen Tengah, ini kasoesahan bisa disingkirken. jaitoe dengen djalan hadepken itoe samoea peladjaran dengen *pikiran terboeka*, jaitoe dangan lantes perlaja, tapi djoega djangan pandang djelek atawa kliroe sabelonnja disaring dan ditimbang lagi sama pikiran jang djernih dan sabar.

Tida ada satoe agama, salaennja dari Buddhism, jang memberi kalaloeasa'an penoeh pada penganoet-penganoetnja boeat memikir dan menimbang dengen pake pikiran sendiri. Tida ada satoe Nabi atawa Penjiar Agama, salaennja Buddha Gautama, jang begitoe tida koekoeh pada peladjarannja. Tjobalah soedara-soedara denger dan timbang apa jang Buddha oendjoek pada orang-orang jang minta keterangan bagaimana moesti mentjari kabeneran. Buddha bilang:

„Djangan pertjaja apa-apa tjoemah lantaran mendenger tjeritanja orang.

„Djangan pertjaja pada apa jang soedah berdjalan toeroen-menoeroen tjoemah lantaran soedah lama atawa dari djeman koeno dianggep betoel oleh kake-mojang teroes sampe tjoeljoe-boejoet.

„Djangan pertjaja pada segala kabar-kabar angin, atawa apa-apa jang belon pasti, tjoemah lantaran orang banjak sainget gêmpérin.

„Djangan pertjaja tjoemah lantaran orang kasih oendjoek padamoe kasaksian dari toelisannja satoe

LEZING-LEZING DI KWAN IM TONG.

Nabi dari djeman koeno.

„Djangan pertjaja apa-apa tjoemah lantaran anggepan atawa sangka'an oemoem kaliatan ada membenerken, atawa sebab kabiasa'an jang soedah berdjalan banjak taon membikin kaoe pandang itoe hal sабagi barang jang bener.

„Djangan pertjaja apa-apa tjoemah lantaran diakkoein kabenerannja oleh kaoe poenja goeroe atawa pendita-pendita.”

Soedara-soedara ! Kapan orang dapet taoe dan soeka perhatiken ini adjaran dari Buddha, nistjaja banjak kakaloetan dan katjilaka'an dalem kalangan kabatinan aken mendjadi koerang, sebab seperti kita-orang soedah sering dapetken, kabanjakan orang jang dateng minta pertoeloengan, memoedja dan pertjaja abis-abisan pada satoe soe-hoe, kiajie, kramat, toapekong, occultist atawa doekoen, jang disangka mandjoer, soetji, sakti atawa berilmoe tinggi, boekan dari sebab ia soedah *taoe betoel* dan *boektiken* sendiri, hanja hatinja ketarik lantaran *mendenger* orang poenja tjerita, dan itoe orang jang tjerita dan siarken itoe segala dongengan adjaib poeu boekan liat atawa saksiken sendiri, hanja kabanjakan *denger* lagi dari laen orang !

Banjak pertjektjokan, permcesoehan dan penoempahan darah — malah di djeman koeno sering terbit peperangan agama jang mengorbanken djiwanja bilang millioen manoesia — lantaran orang begitoe koekoeh sama kitab-kitab agama jang dipandang soetji dan boenjinja tida boleh dibantah atawa disangsiken, hanja moesti ditoeroet sapenoehnja dengen zonder timbang dan pikir lagi. Banjak kadjahatan telah dilakoeken oleh manoesia lantaran mendenger keterangan atawa andjoeran dari pemimpin-pemimpin dan goeroegoeroe agama jang tjoepet atawa djahat. Banjak rasa kedoeahoeng atawa menjesel kita-orang telah alamken

lantaran ketarik sama aliran oemoem jang menggemparkan, dan zonder menimbang lagi kita telah toeroet tjeboerin diri kerna mengira apa jang orang banjak bilang betoel tentoe *moesti betoel*, padahal kasoe-dahannja mendatengken katjilaka'an dan karoegian. Banjak perboeatan jang tida adil dan kedjem soedah dilakoeken zonder sengadja lantaran orang koekoehin sama atoeran dan kabiasa'an koeno jang soedah berdjalan toeroen-menoeroen dan orang tida maoe pikir lagi betoel atawa tida, hanja ikoetin sadja apa jang soedah mendjadi adat kabiasa'an, oepama atoeran menjembelèh binatang boeat sadjian sembahjang, sidekah dan sabaginja lagi.

Brangkalih soedara-soedara nanti bilang, maski itoe pengadjaran dari Buddha dalem hal menggoenaken pikiran dan pertimbangan jang merdika, ada amat baek dan bener, tapi boeat orang jang bodo atawa belon mengarti bisa djoega timboelken kakaloetan, lantaran marika tida perdoeliken lagi pada titah-titah dari Nabi, kitab soetji dan adat kabiasa'an oemoem, hanja membawa maoenja sendiri jang menjasar.

Ini pikiran, soedara-soedara, memang bener, dan itoe kakaloetan memang bisa terjadi, kapan Buddha tjoemah mengadjar begitoe sadja. Tapi di sabelahnja itoe Buddha poen ada beriken djoega ini pengadjaran :

„Apa jang tjotjok dengen kaoe poenja pengalaman sendiri dan, sasoedahnja lakoeken penjelidikan jang terliti, ada setoedjoe dengen kaoe poenja pertimbangan atawa tjingli jang sehat, serta menambahi kaoe poenja kaselametan dan kaberoentoengannja laen-laen machloek berdjiwa, *itoelah* kaoe boleh terima sabagi satoe kabeneran, dan toentoetlah penghidoepanmoe soepaja satimpal dengen itoe.”

Dengen ini pengadjaran, soedara-soedara, Buddha ada oendjoekin djalan bagimana orang haroes berla-

LEZING-LEZING DI KWAN IM TONO.

koe boeat mengenal apa jang bener, jaitoe pertama, kita koedoe dasarken atas pengalaman dan pertimbangan dengen menggoenaken tjingli jang sehat; kadoea, dengen lakoeken itoe perboeatan, kita poenja kaselametan bisa semingkin tambah, dan katiga, bisa mendatengken djoega kaberoentoengan pada sasama manoesia dan laen-laen machloek berdjiwa.

Djadinya, soedara-soedara, satoe perboeatan atawa sikep, biar poen dibenerken oleh titah-titahnja kitab soetji atawa Nabi, serta ditoendjang dan dipoedji oleh orang banjak, kapan menjilakain pada sasama manoesia atawa laen-laen machloek, dan mengganggoe kita poenja katentreman, itoelah tida haroes dilakoeken. Dan kapan orang soeka memikir dengen djelas dan goenaken pertimbangan sehat jang didasarken djoega atas pengalaman, nanti lantes bisa dimengarti, bahoea perboeatan atawa atoeran jang bangkitken permoesoehan, kabentjian, katachajoelan, katemaha'an dan sabaginja lagi, jang achirnja tida membawa kaselametan dan mengganggoe katentreman, itoe samoea haroes didjaoehken, tida perdoeli oleh kitab-kitab agama, atawa oleh Nabi-nabi dan pendita-pendita dan orang banjak, dibilang „bagoes dan betoel.”

Dengen menggoenaken ini matjem anggepan, orang nanti bisa timbang sendiri apa samatjem ilmoe, agama atawa pelajaran batin, ada harga boeat diperhatiken atawa tida. Kaloe penganoetnja djadi sompong dan pandang rendah pada orang-orang jang menganoet agama laen, dengen toedjoeannja selaloe pikir kapentingan sendiri jang bersifat kouwkti—oepama anggep dirinja bakal masoek di sorga sedeng orang-orang jang menganoet laen kapertjaja'an bakal masoek naraka—teranglah itoe pelajaran *tida baek* biarpoen penganoetnja ada berdjoeumlah besar.

Boeat bisa pernahken diri dengen betoel dalem sahoeatoe hal, memang orang haroes mempoenjai banjak

pengalaman dan bisa memikir dengen djelas dan loeas. Disini kaliatan Buddha poenja peladjaran ada berat, sebab boeat orang bodo atawa kapinterannja saderhana, jang tida bisa menimbang atawa memikir sendiri, tida gampang aken lantes mengarti dengen betoel—tida sembarang orang bisa mengambil djalan jang betoel-betoel di tengah, tida miring ka kanan kiri. Tetapi peladjaran jang tinggi dan berfaedah samoeanja memang soesah, boekan sadja peladjaran batin, hanja peladjaran jang mengenaken oeroesan doenia, seperti boeat dapet samatjem kapinteran — oepama mendjadi dokter — orang haroes beladjar dengen giat dalem tempo jang lama. Dan itoe Kabener-an boekan ada barang jang sembarang orang bisa dapetken, dan dari sebab kafaedahannja *besar*, maka jang hendak tjari dan poenjaken padanja haroes djoega kaloearin *tenaga dan kagiatan besar*. Siapa hendak mentjari kaselametan bagi dirinja sendiri tjoemah dengan mengandel pada pertoeloengan dari loear, jang didjandijken dalem berbagi-bagi agama atawa oleh soehoe dan kiajie jang mengadjarin ilmoe, pastilah aken alamken kagagaian, atawa apa jang ia dapet tida bisa kekel, sebab boekan didasarken atas pengalaman dan pengartian.

Berhoeboeng dengen adanja itoe pengadjaran dari Buddha, maka saja poen hendak minta dan peringketen pada soedara-soedara sekalian, aken djangan lantes pertjaja dan mengandel pada apa jang saja atawa laen-lean orang bitjaraken dan terangken dalem lezing-lezing di ini klenteng, hanja sasoeatoe soeal jang diroendingken haroes ditimbang lagi apa bener atawa tida. Kapan ada jang koerang terang atawa tida tjetjok dengan soedara-soedara poenja pikiran, boleh madjoeken pertanja'an, dan kaloe merasa apa jang diterangin disini tida setoedjoe sama pengalaman atawa pertimbangan sendiri, boleh traoesah toeroetata-

Sam Kauw Hwe Menado.

Lezing dari Toeān Tjia Djoe Tjiat di gedong Tjeng Lian Hwe pada tanggal 1-10-2487 (14-11-1936) djam 7 malem, membitjaraken :

PENGADJARAN DARI KHONG TJOE TENTANG „GIE“, JAITOE KADJOEDJOERAN DAN KA'ADILAN.

Manoesia kaloe maoe berlakoe ADIL, hatinja moesti DJOEDJOER, dan orang jang berhati DJOEDJOER sentiasa maoe ADIL.

Samoea orang bisa membedaken antara ADIL dengan TIDA ADIL dan DJOEDJOER dengan TIDA DJOÉDJOER; tapi mengapatah manoesia, maskipoen taoe bedaken itoe ADIL dengan TIDA ADIL, jang berarti BAEK dengan DJAHAT dan DJOEDJOER dengan TIDA DJOEDJOER atawa BENER dengan TIDA BENER, ada lebih banjak jang tida soeka aken berlakoe ADIL dan tida maoe berlakoe DJOEDJOER?

Manoesia memang soeka pada KA'ADILAN dan KADJOEDJOERAN, sabagimana Nabi Khong Hoe Tjoe soedah beriken itoe pengadjaran dari hal GIE

wa djalanken.

Buddhisme sabenernja ada bersifat wetenschappelijk, maka tida takoet sama oedjian dan pepereksaan jang terliti, kerna berdasar atas pikiran merdika, hingga sasoeatoe orang bisa oesoet dan boektiken sendiri kabenerannja dengan goenaken pengalaman. Dan kapan soedara-soedara soedah timbang dengan betoel, saja pertjaja hatsilnja tida bisa laen, hanja soedara-soedara nanti akkoe bahoea Buddha poenja *Djalanan Tengah* atawa *Tiong Too* ada sanget berfaedah bagi manoesia poenja kahidoepan, lahir atawa poen batin.

Selamet malem.

pada kita-orang, dan sabagimana Wet-negri poenja maksoed soepaja samoea orang haroes memegang KA'ADILAN dan KADJOEDJOERAN.

Tapi dari sebab dalem diri manoesia djoega ada hidoe satoe kakoeatan perasa'an jang melengket pada kasenangan Doeniawi, maka dalem diri manoesia dengen sendirinja terbitlah perlawanan diantara itoe kadoea kakoeatan, jani: kakoeatan jang soeka pada KA'ADILAN dan KADJOEDJOERAN dan *kainginan* pada kasenangan Doeniawi,

Kadoea kakoeatan itoe sama-sama ada hidoe dalem badan manoesia, jaitoe jang dinamaken BATIN. Maka kamenangan dan kakalahan dalem itoe doea perlawanan melenken ada bergantoeng pada BATIN, kaloe pada BATIN itoe ada njaman, maka kasoeakan pada KA'ADILAN dan KADJOEDJOERAN aken menang, tapi kaloe BATIN itoe lemah dan roesak, maka menanglah KAINGINAN PADA KASENANGAN DOENIAWI. Kalemahan dan karoessakan pada BATIN ada berarti: BATIN itoe sakit, dan sabagimana pada anggota-anggota badan manoesia apabila sakit haroes diberiken obat, demikian BATIN itoe haroeslah diobati. Aken tetapi penjakit BATIN boekan seperti penjakit pada anggota-anggota badan manoesia jang beroesah obat dokter, doekoen dan sabinja; adapoer penjakit *batin* melenken haroes diobati dengen penerangan-penerangan sedjati, jaitoe pengadjaran-pengadjaran dari Nabi jang menghaloessen pri boedi manoesia.

Doenia perloe dengen KA'ADILAN, dan doenia perloe dengen KADJOEDJOERAN; doenia aken ada dalem PERDAMIAN dan SANTAUSA kaloe ada KA'ADILAN dan KADJOEDJOERAÑ, dan doenia aken penoeh dengen KADJAHATAN dan KAROESAKAN kaloe tida ada KA'ADILAN dan KADJOEDJOERAN.

Demikian dalem perhoeboengan manoesia, dalem familie aken *perdamian* dan *pertjinta'an* saorang pada jang laen, kaloe ada KA'ADILAN dan KADJOEDJOERAN.

Perhoeboengan manoesia teroetama ada dalem familie, komoedian baroelah ada perhoeboengan di loearan, pada sobat-ande dan kenalan. Dan samoeanya aken ada dalem *pertjinta'an* dan *perdamian* sejamanja ada KA'ADILAN dan KADJOEDJOERAN, Satoe kalih tida ada KA'ADILAN dan KADJOEDJOERAN, *perdamian* dan *pertjinta'an* roesak binasa. Karoesakan dan kabinasa'an menerbitken perselisihan dan permoesoehan. Demikian penghidoepan manoesia dalem doenia kapan sekalih tida ada KA'ADILAN dan KADJOEDJOERAN.

BATIN jang baek bisa memelihara KA'ADILAN dan KADJOEDJOERAN jang berboeah PERDAMIAN dan PERTJINTA'AN antara manoesia, dan BATIN jang roesak menerbitken bintjana, pertjidera'an dan permoesoehan toeroen-menoeroen.

Batin jang njaman haroes dipelihara, dan jang roesak atawa lemah diobati, soepaja jang njaman te-roes tinggal njaman dan batin jang lemah dan roesak bisa djadi njaman.

Pemelihara'an jang santausa pada batin jang njaman, dan obat jang mandjoer boeat batin jang roesak dan lemah, ada satoe sadja, jaitoe pengadjaran-pengadjaran dari Nabi. Asal orang memperhatiken bener, djikaloe membatja boekoe-boekoe pengadjaran dari Nabi, atawa mendenger dengen taroh kira dan perhatian soenggoe apabila mendenger pengadjaran-pengadjaran dari Nabi.

Orang jang bisa berlakoe menoeroet KA'ADILAN dan KADJOEDJOERAN aken merasa SELAMET dan BEROENTOENG dalem hidoepnja, kerna penghidoepannja tida terganggoe seperti orang jang tida

memegang KA'ADILAN dan KADJOEDJOERAN.

Kaloe selamanja hidoept kita memegang KA'ADILAN dan melakoeken KADJOEDJOERAN, ada apatah ditakoeti, kerna samoea kita menoeroet Wet Allah dan menoeroet Wet doenia, ta dape tiada kita poenja hidoept ada senang dan selamet, tapi **kaloe** dalem penghidoepan kita-pake hati tida sama KADJOEDJOERAN dan soeka berboeat hal-hal jang tida menoeroet KA'ADILAN, maskipoen itoe dilakoeken dengan akal dan tipoe daja jang aloes sampe tida kalahatan oleh doenia, tapi kita sendiri jang sengadja berboeat itoe, kita sendiri jang ada mengetaoei itoe, kita sendiri jang senantiasa teroes ada inget itoe perboeatan, boekankah itoe ada djadi bajang-bajang katakoetan jang membikin kasangsara'an dalem kita poenja sapandjang penghidoepan?

Maskipoen Nabi Khong Hoe Tjoe dalem la poenja pengadjaran pada kita-orang, tida mengasih penerangan, pembalesan apa orang aken dape, djikaloe melangkah KA'ADILAN dan KADJOEDJOERAN, tapi manoesia djoega dape ketaoei dan sendirinja dape lah merasa boeah-boeah dari perboeatannja.

Boekankah kita sendiri amat merasa senang, apabila kita melakoeken soeatoe perboeatan **baek**, oepamanja menoeloeng orang dari tjilaka, beriken amal, dan laen-laen pérboeatan jang baek? Boekankah kita nanti merasa koeatir dan katakoetan sasoedahnja kita melakoeken perboeatan-perboeatan djahat, atawa kita merasa menjesel djoega, biarpoen dengan tida sengadja atawa koerang perhatiken kita soedah berboeat kasalahan sampe mengadaken kasoesahan atawa sedikitnja mendjadiken orang laen merasa tida senang?

Inilah jang diseboet boeah-boeah perboeatan kita, dan itoelah ada pembalesan-pembalesan pada perboeatan kita, dan masing-masing dape lah merasa da-

SAM KAUW HWE MENADO.

lem dirinja apa jang dioendjoek di atas ini.

Demikian dengen pendek saja poenja Lezing ini, tapi lebih doeloe dari saja toetoep ini Lezing, saja balik sedikit pada perkata'an jang tadi, jani:

Batin jang njaman haroes dipelihara, dan batin jang roesak dan lemah diobati, soepaja batin jang njaman teroes tinggal njaman dan batin jang lemah dan roesak bisa djadi njaman.

Pemelihara'an jang santausa pada batin jang njaman dan obat jang mandjoer boeat batin jang roesak dan lemah, ADA SATOE SADJA, jaite pengadjaran-pengadjaran dari Nabi, asal sadja orang soeka memperhatiken bener-bener djikaloe membatja boekoe-boekoe pengadjaran dari Nabi, atawa dengen tarokira dan perhatian soenggoe-soenggoe apabila mendenger pengadjaran-pengadjaran dari Nabi.

Demikian pada perasa'an saja; ada baek djoega, pada penoetoep ini Lezing, djikaloe saja oelangken poelah sedikit perkata'an ini, dengen pengharepan besar, moedah-moedahan bisa djadi seperti SATOE GERAKAN pada kita, Njonja-njonja, Nona-nona dan Toean-toean jang hadlir dalem ini Perhimpoenan, aken MEMPERHATIKEN BENER-BENER, djikaloe membatja boekoe-boekoe pengadjarannja Nabi, kerna artinja oetjapan-oetjapan dari Nabi ada dalem, haloës dan soetji maksoednja.

Djikaloe kita soeka batja dan memperhatiken betoel-betoel Nabi poenja pengadjaran, nistjalalah kita dapetken maksoednja, dan bila kita soedah dapet itoe pengartian biarpoen baroe sedikit sadja, dapetlah kita perasa'an betapa moelia adanja Nabi poenja pengadjaran, dan demikian terboekalah djalan pada kita aken menoedjoe ka penerangan aken pri penghidoepan manoesia di ini doenia. Begitoepoen apabila kita dateng dalem Perhimpoenan-perhimpoenan Lezing-lezing sabagini, wadjiblah kita mendenger dan taro

Kapentingannja Sam Kauw Hwe adaken Loen-Lie.

OLEH THE SOEN TING, TEMPEH.

Pada satiap tjee-it dan tjap-go Sam Kauw Hwe Tempeh biasa adaken pertemoean dalem gedongnya sendiri aken beroending (loen-lie) ilmoe pengataoean batin dan peladjaran dari Nabi-nabi.

Ini pertemoean sasoenggoenja ada baek, sebab sa-laennja menambahin masing-masing leden poenja pengataoean, djoega menegoehken tali persoedara'an. Dan dipandang dari sihak pergaoelan poen ada banjak baeknya, sebab adanja tempat pertemoean antara sagolongan orang jang soeka perhatiken kabatinan, ada djadi andjoeran aken orang pikirin kabaekan dan achirnya djadi berdjalan baek. Maka bagi saorang jang batinnja masih lemah dan belon bisa memilih atawa mengenal perbedaan antara perboeatan jang berharga dan tida berharga, kapan bisa sering bergaoel dengen penjinta-penjinta kabatinan, pastilah aken mendapat banjak kafaedahan.

Boeat bikin itoe matjem pertemoean seperti jang biasa diadaken oleh Sam Kauw Hwe Tempeh memberi hatsil jang penoeh, ada perloe itoe orang-orang jang hadlir, teroetama pemimpin-pemimpinnya, djangan kandoeng rasa somborg dan bangga, jaitoe

kira betoel-betoel apa jang diroendingken dalem Lezing-lezing itoe, soepaja dapetlah kita insjaf pengadjaran-pengadjaran Nabi jang dibilitaraken itoe, dan boekan sadja kita moesti insjaf begitoe sadja, tapi haroeslah kita melakoeken dan oendjoek itoe dengen perboeatan.

Demikian baroelah ada artinja kita membatja boekoe-boekoe pengadjaran dari Nabi dan kita poenja kadatengan pada saban-saban kalih diboeat Lezing.

anggep dirinja ada paling **pande** dan pinter sendiri. Orang jang beranggepan demikian tida nanti bisa kadatengan sinar Toehan dalem dirinja. Tje emah dengan karendahan dan meloepaken diri sendiri poenja ka'angkoean dan begitoe poen kapentingan, baroelah itoe kakoeatan dateng, dan bakal bisa dirasaken djoega oleh laen-laen orang jang hadlir.

Inilah ada dari lantaran kapan orang tjiptaken satoe pikiran jang koeat dan djoedjoer, lantes moentjoel doeakad jadian: pertama, mengadaken geteran pada Alam-pikiran, jang komoedian membangoenken poelah geteran saroepa pada samoea benda jang berada di sapoeternja. Ka'ada'nnja seperti geteran jang kaloeear dari tali viool jang mengadaken geteran pada oedara dan menimboelken soeara.

Demikian poen ka'ada'nnja itoe geteran jang berada pada pikiran manoesia, kapan berdeketan dengan saorang jang pikirannja moelia dan soetji, ia bisa katoelaran oleh pengaroehnja itoe pikiran soetji; dan begitoe poen kapan ia berdeketan sama orang-orang ang berpikiran tida baek.

Kadoea, sasoeatoe pikiran ada melahirken benda jang hidoep dalem Alam-pikiran, jaitoe jang dinamaken „woedjoet-pikiran”, kerna seperti soedah diketaoei oleh orang-orang berilmoe, apa jang orang pikir ada berwoedjoet, jaitoe terpeta meroepaken sinar jang bisa diliat oleh waspada atawa helderzien. Kapan saorang melahirken boeah pikiran jang baek dan tida kouwkatih, iapoenja woedjoet-pikiran itoe mengambil tempat dalem Alam-pikiran, sedeng boeah pikiran jang tida baek, menoeroet hawa nafsoe dan kouwkatih, itoe woedjoet ada terpeta dalem **Alam-Hawa-nafsce (Kama-loka)**.

Kapan itoe pikiran ada soedjoet, soetji, bersih dan berisi tjinta-asih jang tida kouwkatih, geterannja biasa sampe di Alam Boedhi, dan pengaroehnja ada djace

lebih besar dari apa jang tadi dikataken soedah koeat.

Djadinya apa jang orang lahirken dalem pikirannja, menimboeken geteran dalem alam aloes, jang komoedian menerbitken itoe saroepa geteran djoega pada segala benda di sapoeternja, dan menoelar pada laen-laen orang. Kapan jang melahirken itoe pikiran berkemaoean keras, dan jang terima itoe geteran ada lemah, maka itoe orang bisa kena dipengaroehin hingga lakoeken perboeatan baek atawa poen djahat menoeroet sifatnya itoe geteran jang ia terima. Tetapi geteran pikiran dari saorang jang kouwkatih ada kalah kakoeatannja dengan pikiran dari orang jang beringet-an bersih, kerna pikiran soetji itoe tempatnya ada di alam lebih tinggi, maka mempoenjai pengaroeh lebih besar, dan djaoe lebih koeat hingga soesah dikalahken.

Demikianlah adanja kita poenja pemandangan, dari apa ada ternjata kapan itoe pertemoean-perlemoean dari Sam Kauw Hwe dan laen-laen pakoempoelan kabatinan didjalanken dengan soedjoet, djoedjoer dan pake pikiran bersih, serta tida menjimpang dari azas-azasnya Sam Kauw, boekan sadja sekalian orang jang hadir, hanja pendoedoek dari tempat-tempat di sapoeternja poen aken menarik banjak kafaedahan.

Vereeniging „BOEN-BIO“ Soerabaja.
Membri-Bertahoe

Nanti tanggal 27 Pikkwee 2488. (1 October 1937) pagi djam 8 dalem Boen Bio mengadaken sembahjang boeat peringatan harila hirnja kita-orang poenja TJIE SING SIAN SOE KHONG TJOE

Pada siapa jang hendak toeroet sembahjang, sabelonni djam terseboet dibarep soeka dateng berkoempoel.

Bio aken terboeka sedari pagi djam 7 sampe malem djam 10

Atas Namanja Pengeroes Verg: „BOEN-BIO“
Tjiong Tjing Khoen, Secretaris.

BEBERAPA KABAR DARI TERGERAKAN
SAM KAUW.

HOK KIAN KONG TIK S E, SOERABAJA.

Pada 13 Augustus kita ada terima soerat ondangan dari Bestuur Hok Kian Kong Tik Soe di Soerabaja, jang memberi taoe bahoea pada tanggal 17 Augustus 1937, malem djam 8, dalem krenteng Hok Aan Kiong di Toapekong-straat, Soerabaja, bakal dijalankan ceremonie dengen dipimpin oleh Toean Kam Hwie Hwat Soe, dan diminta soepaja kita dengan familie soeka dateng hadlirin.

Djaoenja tempat dan kakoerangannja tempo membikin kia tida bisa penoehken pengharepan boeat saksiken itce oepatjara, jang kaliatan ada penting, sebab menoeroet kabaran dalem *Sin Tit Po*, itoe ceremonie ada satjara Buddhist, dan sadari beberapa taon, inilah ada boeat pertama kalih dalem krenteng Hok Aan Kiong ada dibikin oepatjara sembahjangan, dan maskipoen dalem itoe soerat ondangan tida di terangkan apa maksoednya, bisa didoega ada berhoeboeng dengen karaja'an *Tiong Goan* atawa *Moeslim Rontok*.

Kita maloemken ini kabaran sakedar boeat oendjoek bagimara Bestuur Hok Kian Kong Tik Soe di Soerabaja kaliatan soedah moelai bergerak aken bangkitken kombali oepatjara dalem krenteng jang berhoeboeng dengen Agama Tionghoa jang tadinja soedah tida dipehatiken.

BATAVIA BUDDHIST ASSOCIATION.

Di bawah ini ada tjetetan dari lezing-lezing jang soedah dan aken dibikin :

29 Juli, 12 dan 26 Aug , 9 dan 23 September, oleh R. Soekirlan : Menerangken toedjoean dari peladjaran Buddha.

5 dan 19 Augustus, 2 dan 16 September, oleh Kwee Tek Hoaij : Buddha poenja Ampat Kabeneran Moelia dan Delapan Djalan Oetama.

30 September: Studieklass, dipimpin oleh Kwee Tek Hoaij.

SUFI-ISME**atawa****Tasawoef di dalem Agama Islam.**

Menoeroet toelisannja Professor R. N. Nicholson.

Berikoet Biografie dari Ghazali dan Roemi, doe
d oeroe-sjair Sufi jang termashoer, dan keterangan
tentang kaoem Derwisj.

Disalin dan dibilitjaraken oleh Kwee Tek Hoaij.

Tida banjak orang jang dapet tace bahoea dalem
Agama Islam poen ada terdapat satoe tjabang besar
jang menoeroet peladjaran Sufi-isme atawa Tasawoef
(Theosofie) jang toedjoemannja bersifat gaib dan dalem
banjak hal ada mirip dengen Buddhismus dan Taoisme
(Hoed-kauw dan Too-kauw).

Kaoem Sufi poen ada pertaja betoel atas adanja
machloek-machloek Soetji dan Gaib, jang dipimpin
oleh satoe wakil dari Toehan jang dinamaken Qutb
(Koetoeb), dengen dibantoe oleh sadjoemblah Goe-
roe-goeroe Soetji atawa Wali-wali boeat memimpin
manoesia ka djalan kaselametan.

Sasoeatoe penjinta kabatinan haroes mempoenjai
ini boekoe jang mengoendjoek satoe dari lapis-lapisan
sabelah dalem dari sarinja Islam, terdiri dari anem
fatsal, seperti berikoet :

- I. Artinja „Sufi”:
- II. Pengaroehnja laen-laen Agama Pada Sufi-isme :
- III. Sifatnja Peladjaran Sufi jang teroetama :
- IV. Ilmoe Tasawoef di Perzie :
- V. Doeä Pamoeka Sufi jang termashoer :
- VI. Kaoem Derwisj:

Model Zak-formaat, terdiri dari 150 pagina, harganja
tjoemah. f 0.40.

Abonne ini maandblad traoesah kirim oewang di-
moeka, nanti ditagih sama oewang abonnement.

BOEKHANDEL „MOESTIKA”

Tjiijoeroeg, (Preanger).